

# Forsa s'interessesch an plirs per il curs a Basilea?

Uffants rumantschs pon frequentar in curs da lingua

CUN BARBARA ALDER HA DISCURRÌ  
CLAUDIA CADRUVI / ANR

■ **Proxima sonda vai puspè liber. Il magister Simon Lombris instruescha en il Wasgenringschulhaus scolars che discurren rumantsch. Ils uffants survegnan la chaschun da pratigar il linguatg ordaifer la famiglia.** Inzià quest curs a Basilea-Citad ha Barbara Alder. Ella è mamma da dus mats ed ella presidescha l'uniun «Scola Rumantscha Basilea». Dapi in onn datti la purschida – exact sco il curs da rumantsch a Turitg (LQ dals 11 d'avust). Puncto finanziaziun stat il curs da Basilea dentant sin chomma pli ferma.

**ANR: Vos avais inizià il curs ed aposta mess en pe l'uniun «Scola Rumantscha Basilea». Danunder vegn la motivaziun per quest engaschi?**

**Barbara Alder:** Mes um Michel Pfister vegn da Vuorz ed ha da bell'entschatta discurren rumantsch cun noss uffants. Quai è anc oz uschia. Cun ils uffants tschantscha el rumantsch. Davos maisa cun la famiglia avain nus simplamain ina maschaida. Sche mes um sa drizza als uffants, fa el quai per rumantsch e sch'el discorra cun mai, èsi per tudestg. Uschia èn ils uffants creschids si cun il rumantsch. Els chapeschan tut. Il figl vegl discorra dapli ch'il giuven. Cura che nus essan ensemble cun la parentella da mes um vegn discurren rumantsch. Ils uffants èn gist stads en vacanzas a Vuorz, nua ch'els han gi la chaschun da duvrar dapli la lingua.

**Avais Vos era emprendi rumantsch?**

Cura che l'emprim uffant è naschi hai jau fatg in curs tar la scola-club Migros. Deplorablmain n'hai jau betg gi temp avunda per propi imprendere plects. Ma entras il curs chapesch jau meglier la structura ed jau hai gea mintga di instrucziun da rumantscha a



**Barbara Alder - iniziata da las lecziuns da rumantsch a Basilea.**

MAD

chasa. Jau taidlel tiers e chapesch pli u main tut.

**Betg mintga mamma u bab s'engascha sco Vos per che l'uffant survegnia instrucziun en sia lingua. Anc ina giada: Pertge s'engaschais Vos uschè ferm?**

Igl è forsa ina tscherta schientscha politica u meglier ditg: Igl è bun per ils uffants da crescer si cun duas linguas. Da quai sun jau persvadida. Els profitesch cunzunt sche la lingua na vegn betg discurren mo dal bab u mo da la mamma, mabain sch'els pon anc resdar cun in magister ed auters uffants e pon leger e scriver in zichel. Uschia emprendan els d'encunuscher la lingua paterna sin in auter nivel. Per responder a la dumonda: Igl è en in tschert senn in engaschi politic per la

furmazion. U era per rinforzar sapientivamain l'identitad rumantscha dals uffants che creschan si en in ambient tudestg. Els duain savair che lur derivanza da vart dal bab è tuttina impurtanta sco quella da vart da la mamma.

**Voss dus mats han us frequentà in onn lecziuns da rumantsch. Tge experientschas avais Vos fatg?**

A partir da l'emprim'ura hai jau percurschi che quai enfirmescha ils uffants en lur identitad e schientscha visavi questa lingua. Las lecziuns èn adina la sonda da las diesch enfin las dudesch cura ch'els auters uffants han liber. Els n'han mai ditg ch'els na lessan betg ir. Els van gugent e sa legran. Quai ha sa chapesch da far cun Simon Lombris ch'è in scolast grondius,

ma era cun ils auters uffants ch'els inscuntran. Da bell'entschatta han ins senti ch'els discurren dapli rumantscha a chasa. Els han cumenzà da betg mo responder per rumantsch, mabain da direct dad els anora ina giada dir insatge per rumantsch.

**Cuntinuan tut ils scolars cun il curs quest'atun?**

Nus avain gi en tut nov scolars. Dad in uffant na sai jau anc betg, sch'el cuntinua. I n'è anc betg cler, sch'i dat forsa novas annunzias. Probabel resti pli u main en questa rama.

**Igl è pia anc pussaivel d'annunziar uffants?**

Absolut. Nus empruvain adina puspè da chattar vias da communitgar e da far attent a la purschida. Forsa datti a Basilea gea anc dapli uffants rumantschs?

**Tgi po frequentar il curs? Sulet sursilvans?**

Fin uss avainsa simplamain gi mo uffants sursilvans. Ma gliez n'è betg cundiziun.

**Era Ladins u Surmirans pon s'annunziar?**

Quai fiss super. Nus giain da quell'anora che mintgin discurren ses idiom. Els emprendan uschia da chapir in l'auter.

**A Basilea para la finanziaziun dal curs d'esser reglada a moda pli segira che a Turitg? Pertge funcziunescha quai meglier a Basilea?**

La finanziaziun n'è anc betg sclerida fin en l'ultim detagl. Il departament d'educziun Basilea-Citad posseda ina structura aposta per curs da lingua e cultura per uffants d'auters linguatgs. Ins metta a disposiziun la mesemna suentermezdi u la sonda ina stanza da scola. Il magister u la magistra sto dentant vegni finanzià dal

pajais d'origin. Uss è il rumantsch sa chapescha in cas spezial, damai che la Svizra è il pajais d'origin e damai che las linguas èn chausa chantunala. Entras quai crudain nus in pau tranter sutgas e baun.

**Co avais Vos finanzià fin uss il magister?**

Nus avain chattà ina schliaziun cun il departament d'educziun che metta a disposiziun a nus questa infrastruttura plus ils daners per ina lecziun. Per la segunda lecziun avain nus, sco uniun da geniturs, tschertgà sponsurs. L'onni passà avain nus survegnì ina contribuzion singula da la Banca chantunala grischuna e nus avain gudagnà la Lia rumantscha sco fautura che stat bun per la garanzia da deficit. Per ils proxims dus onns pudain nus cuvrir ina part da l'import che manca cun ina contribuzion da l'uffizi federal da cultura e dal chantun grischun. Quai munta che nus stuain, sco uniun da geniturs, anc tschertgar ina pitschna summa tar sponsurs.

**La finanziaziun dal curs è segirada meglier a Basilea che a Turitg. Ha quai da far cun Basilea-Citad che posseda dapli experientscha cun glied d'autras linguas?**

Gliez stuess ins dumandar il departament d'educziun. Jau sun l'iniziata da la scola rumantscha ed jau saveva ch'igl existia qua questa purschida da curs da lingua e cultura en noss chantun. Perquai hai jau pensà, sch'i dat tals curs per uffants da l'exteriur, stuess quai bain era esser pussaivel per ina lingua svizra.

**Quant gronda è l'uniun «Scola Rumantscha Basilea»?**

Anc uss essan nus ina pitschna uniun. Per il mument èn cunzunt ils geniturs commembers. Ma en sazez po tgi che vul d'entartar commember.

**Dapli infurmaziuns dattan Barbara Alder e Michel Pfister. Telefon: 061 691 77 70. Email: barbaraalder@bluewin.ch.**